

Акафист
святителю Тихону,
Патриарху Московскому и всея Руси

Празднование 7 апреля (25 марта), 9 октября (26 сентября), 18 (5) октября, 18 (5) ноября

Кондак 1

Избранный архиерею, предивный угодниче и исповедниче Христов, Русский Церкви крепкое ограждение, отечеству нашему ходатаю и заступниче, прославляюще прославльшаго тя Господа, даровавшего нам в тебе новаго и великаго предстателя, похвальное пение восписуем ти; ты же имеяй велие дерзновение ко Владыце Небесе и земли, от всяких нас бед свободи зовущих:

Радуйся, святителю Тихоне, Церкви Православныя похвало и утверждение.

Икос 1

Ангелов Творец и Господь в буреносныя дни мятежа и нестроения велия, восхотев людем страждущим утешение даровати, яви тя, патриарше претихий и предобрый, яко светило светозарное, светом Трисияннаго Божества озаряющее души верных, да и ныне грядут по тебе вси желающие со Христом быти, сего ради во умилении вопием ти:

Радуйся, от жребия патриаршества аки от монашескаго послушания не уклонивыйся; радуйся, ревностному исполнению Божественных хотений научивыйся. Радуйся, на престол патриарший, двесте лет пустовавый, в день Введения во храм Пресвятыя

Богородицы возшедый; радуйся, в день Благовещения со престола первосвятительскаго ко Престолу Пресвятыя Троицы прешедый. Радуйся, первосвятительством и исповедничеством украшенный; радуйся, для Бога живой и Богом просветленный. Радуйся, яко подвигом своим патриаршество непреложно утвердивый; радуйся, образ пастыря добраго собою явивый. Радуйся, Донския обители сугубое прославление; радуйся, Православныя Церкви во Америце утверждение. Радуйся, российскийя паствы боговидное наследие; радуйся, богоначертанный свиток правыя веры.

Радуйся, святителю Тихоне, Церкви Православныя похвало и утверждение.

Кондак 2

Видя люди российстии о попрании святынь православных зело скорбящия и страхом объята, упованием полагаал еси верным живот вечный, а не смерть имети; темже светом богоразумия твоего, Тихоне благосерде, и нас озари, да купно с тобою вопием Творцу всяческих: Аллилуия.

Икос 2

Разум богопросвещен имея, богомудре Тихоне, отвергл еси всяческое плоти мудрование, с разумом же и волю повинул еси Господеви, темже сосуд чист и селение Духа Истины явился еси. Сего ради яко богомудраго наставника тя ублажающе, воспеваем:

Радуйся, от лет юношеских патриарх именованный; радуйся, делателю винограда Христова избранный. Радуйся, яко благостынным святительством

утверждению Православия во Америке споспешествовал еси; радуйся, яко всегда к высоте добродетелей пасомых тобою вел еси. Радуйся, стадо, тебе от Христа врученное, во спасение наставивый; радуйся, и сам вседушно Царствия Горняго вожделевый. Радуйся, премудрости Божией созерцателю и проповедниче; радуйся, разума Апостольския Церкви хранителю. Радуйся, златоустый благовестниче православныя правды; радуйся, небоязненный обличителю суемудрия и неправды. Радуйся, праведности дивное благоухание; радуйся, не посрамляяй нашего упования.

Радуйся, святителю Тихоне, Церкви Православныя похвало и утверждение.

Кондак 3

Сила Вышняго яве показатя, священнопроповедниче Тихоне, в трудех крестоношения суца, егда всеоружием Божия благодати козни тьмочисленных враг православныя веры разрушал еси, Богу поя победительно: Аллилуия.

Икос 3

Имея веру несумненну и помысл чист, вся красная мира сего презрел еси, Тихоне богоблаженне, и в чине святительством Господеви неленостно послужил еси. Темже благостию украшенный и ведением свыше озаренный, аки звезда путеводная светиши всем, вопиющим тебе:

Радуйся, Единого Христа всем сердцем возлюбивый; радуйся, дарованный талант приумноживый.

Радуйся, яко угождал еси Богу всяческим благоугождением; радуйся, вооруженный мудростию, кротостию и смирением. Радуйся, правды и истины прежде всего искавый; радуйся, истину дерзновенно вещавый. Радуйся, заточение правды ради небаязненно претерпевый; радуйся, смиренномудрием вознесенный. Радуйся, вечную мзду добродетельми стяжавый; радуйся, яко оными и противляющихся воле Божией удивлявый. Радуйся, о утверждении паствы твоея присный ходатаю; радуйся, теплый к Богу о нас предстателю.

Радуйся, святителю Тихоне, Церкви Православная похвало и утверждение.

Кондак 4

Бурю внутри имея помышлений суетных не возможем, Тихоне всеумдре, величие исповедничества твоего проповедати, обаче твоими молитвами у Престола Всевышняго в правоверии и благочестии укрепляеми, воспеваем Ему: Аллилуия.

Икос 4

Слышавше людие о благоплодных добротах души твоея, богоносне Тихоне, желанием вожделеша тя видети на престоле первосвятительством, абие свыше свидетельствован был еси яко сосуд Божественнаго изволения. Темже дивящися чудному Божию промыслению, приносим ти благохваления сицевая:

Радуйся, Первосвятителю, от Самого Господа проначертанный; радуйся, мужу желаний, пасти стадо Христово избранный. Радуйся, Пастыреначальника Иисуса Христа благоволение;

радуйся, незыблемости вечных христианских истин подтверждение. Радуйся, апостолом сопричастниче; радуйся, великим святителем сопрестольниче. Радуйся, яко первопрестольником богомудрым равночестен явился еси; радуйся, яко преемником твоим верный путеводитель ко спасению соделался еси. Радуйся, духови повинувый плотская мудрования; радуйся, спасительнаго Православия немолчное назидание. Радуйся, чудес приснотекущий источниче; радуйся, молитвенниче народный, старче и любимче всея Руси.

Радуйся святителю Тихоне, Церкви Православныя похвалою и утверждение.

Кондак 5

Боготечную звезду яви тя Господь, досточудне отче наш Тихоне; зане паству твою добре осиял еси светом Православия, правы стези указуя к Царствию Христову и научая присно взывати к Богу: Аллилуия.

Икос 5

Внегда поставлен был еси на свещнице служения первосвятительскаго, всемудре Тихоне, потщался вседушно Богу благоугодити и не вотще потрудился еси, просвещая омраченныя страстьми. Мы же, ведяще тя архипастыря богомудра и строителя дому Божия верна и предобра, похвальная возсылаем ти:

Радуйся, у кормила правления церковнаго твердо стоявый; радуйся, свет Христов верным возсиявый. Радуйся, нужды духовно окрадуемых предваряя; радуйся, в попечении о Церкви на всяк день умирание подъемляя. Радуйся, душетленному зверю

стадо твое расхищати не попустивый; радуйся, Церковь, в гонениях сущую, верную Христу сохранивый. Радуйся, яко тобою миродержца избавляемся; радуйся, яко тобою ревности по Бозе исполняемся. Радуйся, яко красен явился еси богословием и благими деяньми; радуйся, яко мерзкаго неистовства потребил еси мудрование. Радуйся, яко пресекл еси прелести гноение; радуйся, народу православному похваление.

Радуйся, святителю Тихоне, Церкви Православныя похвало и утверждение.

Кондак 6

Проповедник благочестия воистинну явился еси, делателю непостыдный и право правящий слово истины, священноначальниче Тихоне, яко добрый воин Христов ограждая паству твою в годину смертных искушений и подвизая взывати истинному Богу: Аллилуия.

Икос 6

Возсиял еси в первопрестольной яко звезда лучезарная, блистанием учений твоих и исповедничества озаряя души верных и разгоняя тьму нечестия. И ныне плоды сеяния твоего насыщаеши вся, яже со удивлением и любовью взывают к тебе:

Радуйся, на престол первосвятительский Промыслом Божиим возшедый; радуйся, крестный путь с паствою своею прошедый. Радуйся, яко жезлом благоволения стадо Христово пасл еси; радуйся, яко овец заблуждших и обреченных на закление не

оставил еси. Радуйся, потерянную овцу отыскавый, угнанную возвративый; радуйся, пораженную перевязавый, больную укрепивый. Радуйся, утолстевшее и буйное овча истребивый; радуйся, богомерзких ересей востание отразивый. Радуйся, от распрей церковных много скорбевый; радуйся, несправедное лишение сана и монашескаго звания претерпевый. Радуйся, яко для народа русскаго его драгоценное сокровище – Церковь и святое Православие – сохранивый; радуйся, яко твоими труды и ныне живем и движими есмы.

Радуйся, святителю Тихоне, Церкви Православныя похвалою и утверждение.

Кондак 7

Желая невозбранно пастырем добрым быти, емуже суть овцы своя, потщался еси, богоносне Тихоне, на пользу душ стада твоего всем вся быти, да вси възыщут Единого Бога. Мы же, уповая достигнути спасения преславным ходатайством твоим, со дерзновением воспеваем: Аллилуия.

Икос 7

Новаго и дивнаго попечителя Церкви Российския вемы тя, святителю Тихоне, понеже во исповедании твоём не устрашился еси человеческих прещений, и святоотеческия заветы соблюл еси. Сего ради и крепость духовную подаде ти Подвигоположник Христос; мы же недостойнии возносим ти сицевая:

Радуйся, самоотвержение всецелое показавый; радуйся, спасения многих възыскавый. Радуйся, яко волков хищных от паствы твоея отгнал еси; радуйся,

яко коварство их мудро распознал еси. Радуйся, над всеми кознями сатанинскими восторжествовавший; радуйся, всеоружие благочестия подъявший. Радуйся, Промысла Божия о людех провозвестниче; радуйся, дивное нравов очистилице. Радуйся, сокровищ православныя веры усердный хранителю; радуйся, Божия благоволения к людем исполнителю. Радуйся, таинниче Божий, еще на земли небесных благ вкусивый; радуйся, святость души твоя житием явивый.

Радуйся, святителю Тихоне, Церкви Православныя похвало и утверждение.

Кондак 8

Странное и преславное чудо есть маловерным и малодушным зрети, богоявленне Тихоне, како в лютых гонениях престол первосвятительский имея, священную жизнь стяжавая, православную утвердил еси веру и премудростию твоею и словес благодатию научил еси стадо твое богоугодно воспевати: Аллилуия.

Икос 8

Весь исполнь любви Христовы, Тихоне благосерде, паству свою не оставил еси: яко Ангел-Хранитель чадом своим пребываеши, молитвы Всевышнему о них возсылая: сего ради усердно чтем светлую память твою, благодарственное хваление воспевая ти:

Радуйся, обилием любви твоя мир удививый; радуйся, в чине властителя кротость и снисхождение явивый. Радуйся, славу предобраго и преблагаго владыки снискавший; радуйся, свет царствия

небеснаго на земли показавый. Радуйся, апостольских преданий ревнителю; радуйся, церковных канонов премудрый насадителю. Радуйся, в святительском служении своем труд и подвиг, а не славу и почет прозревый; радуйся, истинно правоверныя повеления подавый. Радуйся, яко Божественнаго священства правило был еси; радуйся, яко великое воздаяние первосвятительства приял еси. Радуйся, каменю драгий, землю Русскую всю украшая; радуйся, на славословие Божие нас, немощных, созываяй.

Радуйся, святителю Тихоне, Церкви Православныя похвало и утверждение.

Кондак 9

Подвигом добрым подвизался еси, всечестне Тихоне, непреткновенно течение лет совершил еси: благостынною и боголюбезною душею твоею к вечному животу преселился еси, идеже с чинми небесными и собором святых купно поеши Богу победную песнь: Аллилуия.

Икос 9

Ветия многовещанныя не возмогут по достоянию изрещи пречуднаго прославления памяти твоея, богогласне Тихоне; мы же, к покаянию тобою подвигаеми и благосердию твоему подражати хотяще, песнями похвальными тя ублажаем сице:

Радуйся, добрый твоего стада наставниче и правителю; радуйся, колеблющихся в вере твердый оградителю. Радуйся, свирепство имущих власть небаязненно претерпевый; радуйся, кесарю токмо

кесарево воздавай. Радуйся, славу Царя царствующих и Господа господствующих мужественно воинствовавай; радуйся, спасительная предания нам предавай. Радуйся, яко тобою святое Православие ревностно охраняется; радуйся, яко тобою всякий порыв к небесному благословляется. Радуйся, во мраке нечестия правую веру утверждаяй; радуйся, гнев Божий на милость к нам грешным прелагаяй. Радуйся, великими московскими святители вспомоществуемый; радуйся, покровом Пречистая Богородицы осеняемый.

Радуйся, святителю Тихоне, Церкви Православныя похвалою и утверждение.

Кондак 10

Спасти хотя Церковь Русскую, преславне отче наш Тихоне, скверная учения беззаконных анафематствовал еси, богоборцем противяся тако, яко убояшася тя, вторым Ермогеном нарицающе. Мы же почитающе всечестную память страданий твоих вопием прославльшему тя Богу: Аллилуия.

Икос 10

Забрало незыблемо и благонадежно Церкви явился еси, показуя собою мужественнаго борения образ и утверждая дела и словеса крепко стояти за правую веру, священноглагольниче Тихоне. И ныне светом твоим тьма отгоняется и обнажается плетение лукаваго совета, Божественныя твоя мудрости сияньми, да вси вопием ти сице:

Радуйся, яко злочестия ересеначальника посрамлены показал еси; радуйся, яко нрав дерзкаго

безбожия всенародно обличал еси. Радуйся, Новомучеников российских и сущих в гонениях за Церковь удобрение; радуйся, яко и сам принимал еси за Христа заточение. Радуйся, вольным Христовым страданием подражавый; радуйся, страдания за Христа и Церковь Его радостию почитавый. Радуйся, страданием исповедание совершивый; радуйся, на Бога Промыслителя все упование возложивый. Радуйся, яко обличаеши прелести сокровенная; радуйся, яко ужасаеши нечестивых помышления. Радуйся, правую веру чрез многи подвиги непреложно утвердивый; радуйся, благочестивую отрасль твоями возрастивый.

Радуйся, святителю Тихоне, Церкви Православная похвало и утверждение.

Кондак 11

Пение умиленное приносим ти, таинниче Христов, сияеши бо ныне на небеси благолепия венцем украшен: яко верен святитель правдою одеялся еси и в рай сладости ликуеши; Отца Небеснаго о песнословящих тя прилежно моли и вопиющих Ему: Аллилуия.

Икос 11

Всемирнаго светильника яви тя Христос, богодухновенне отче наш Тихоне: ведый сердца твоего смирение, на престоле святительством ты посади. Ты же благовония жертву всего себе Ему принося, иерей был еси и жертва; сего ради немолчными гласы глаголем ти:

Радуйся, светлостию жития возсиявый; радуйся, живот нестареющийся достойно приявый. Радуйся, истины державный поборниче; радуйся, покаяния рачительный проповедниче. Радуйся, лжеучителей лукавство разоривый; радуйся, маловерных в православной вере утвердивый. Радуйся, за веру православную и благочестие российское заточение от безбожных приявый; радуйся, мучение за Христа благодушно претерпевый. Радуйся, яко силою Божией в подвиге непобедим явился еси; радуйся, яко храм всечестен Богу был еси. Радуйся, паствы твоея изрядный душепопечителю; радуйся, на помощь тя призывающим скорый пособителю.

Радуйся, святителю Тихоне, Церкви Православныя похвало и утверждение.

Кондак 12

Благодать восхотев восприяти от Щедродателя Владыки всех и Господа, прежде конца явился еси, всехвальне отче Тихоне, мертвенностию жизненосною ко греху одеян, Христа чтити научая богоприятне. Той же дарованием чудес обогати тя, освяти и прослави на небеси и на земли, научая о тебе воспевати: Аллилуия.

Икос 12

Поюще венец исповедничества, приемый тобою, Тихоне досточудне, недоумеем, како воистинну наречем тя, ибо тобою в Троице славимый Бог наш славно прославися. Сего ради приносим ти похваления сицевая:

Радуйся, труд крестоношения богоугодно подъявый; радуйся, токмо благоволения Божия искавый. Радуйся, сосуде, Духа Святаго исполненный; радуйся, дарами Духа Владычня обогащенный. Радуйся, вечное приемый от Бога благословение; радуйся, людем твоим испросивый Божие благоволение. Радуйся, многоцелебныя мощи твоя во огни явивый; радуйся, сими храм от огня сохранивый. Радуйся, славы Божия велий ревнителю; радуйся, молитв наших скорый исполнитель. Радуйся, паствы твоя присное радование; радуйся, во всем житии твоём Православия путевождю.

Радуйся, святителю Тихоне, Церкви Православныя похвало и утверждение.

Кондак 13

О пастырю наш предобрый, святыи патриарше Тихоне! Приими сие малое тебе хваление и моли венчавшаго тя славою Господа Сил, да возродит во Христе страну Российскую; да дарует мир жительству нашему и Церкви святей Своей, ограждая ю от всех душепагубных и безбожных веяний; да обратит в любовь к Себе и ближнему сердца всех человек; да дарует познати Себе Духом Святым Своим велию множество соотечественников наших, вере не наученных и от веры отвращенных; да сподобимся ныне и присно и во веки веков едином сердцем и единими усты воспевати Ему: Аллилуия.

(Этот кондак читается трижды, затем икос 1 и кондак 1)

Икос 1

Ангелов Творец и Господь в буреносныя дни мятежа и нестроения велия, восхотев людем страждущим утешение даровати, яви тя, патриарше претихий и предобрый, яко светило светозарное, светом Трисияннаго Божества озаряющее души верных, да и ныне грядут по тебе вси желающии со Христом быти, сего ради во умилении вопием ти:

Радуйся, от жребия патриаршества аки от монашескаго послушания не уклонивыйся; радуйся, ревностному исполнению Божественных хотений научивыйся. Радуйся, на престол патриарший, двесте лет пустовавый, в день Введения во храм Пресвятыя Богородицы возшедый; радуйся, в день Благовещения со престола первосвятительскаго ко Престолу Пресвятыя Троицы прешедый. Радуйся, первосвятительством и исповедничеством украшенный; радуйся, для Бога живой и Богом просветленный. Радуйся, яко подвигом своим патриаршество непреложно утвердивый; радуйся, образ пастыря добраго собою явивый. Радуйся, Донския обители сугубое прославление; радуйся, Православныя Церкви во Америце утверждение. Радуйся, российския паствы боговидное наследие; радуйся, богоначертанный свиток правыя веры.

Радуйся, святителю Тихоне, Церкви Православныя похвало и утверждение.

Кондак 1

Избранный архиерею, предивный угодниче и исповедниче Христов, Русский Церкви крепкое

ограждение, отечеству нашему ходатаю и заступниче, прославляюще прославльшаго тя Господа, даровавшаго нам в тебе новаго и великаго предстателя, похвальное пение восписуем ти; ты же имей велие дерзновение ко Владыце Небесе и земли, от всяких нас бед свободи зовущих:

Радуйся, святителю Тихоне, Церкви Православныя похвало и утверждение.

Молитва

О пастырю наш добрый, святой великий патриарше Тихоне, яко град горний ты явился еси, добрая дела твоя и доныне светятся пред человеки. Ве мы, яко ты, предстоя Престолу Пресвятыя Троицы, велие имаши дерзновение в молитвах пред Господем. Воззри и ныне на нас грешных и недостойных чад твоих, к тебе бо яко имущему велие дерзновение пред Творцем всяческих, ныне припадаем и усердно молимся: умоли Господа, да подаст нам решимость стяжати благочестие отцев наших, егоже ты стяжал еси от юности твоя. Ты в житии своем ревностный защититель и хранитель истинныя веры был еси, помози и нам незыблему соблюсти веру православную. Тихая бо душа твоя зело преуспела в Божественном смиренномудрии, научи и нас разум наш питати не многомятежною мудростию человеческою, но смиренным познанием воли Божией. Ты пред лицом лютых врагов Христовых истиннаго Бога дерзновенно исповедал еси, молитвою своею укрепи нас, малодушных, да и мы всегда и всюду противостанем духу безбожия и лести.

Ей, угодниче Божий, не презри нас, молящихся тебе, ибо не токмо от бед и скорбей избавление просим, но силы и твердости, великодушия и любви просим, дабы переносити оныя напасти, возстающия на ны. Испроси нам неослабное терпение даже до конца жития нашего, мир с Господом и грехов отпущение. Отче святой! Укроти в стране нашей ветры неверия и смуты, да водворит Господь на земли Российской тишину и благочестие и любовь нелицемерную. Молитвами твоими да сохранит ю от междоусобных брани, да укрепит святую Церковь нашу Православную, да не оскудеет она истинными пастырями, добрыми делателями, право правящими слово евангельския истины. Упаси и заблуждшия овцы стада Христова. Наипаче же моли Господа сил, да возродится земля святым покаянием и единым сердцем и едиными усты прославит дивнаго во святых Своих Бога в Троице славимаго Отца и Сына и Святаго Духа во веки веков. Аминь.